

Wulf Wagers wunderliche Weltbetrachtung

Musikanta send Lompa

A Läba ohne Musik könnt i mir net vorstella. Sie? I ka no so schlecht drauf sei – wenn i musiziert han, goht mr's wieder guad.

Letztscht Woch' ben i en Berlin gwäa. No hot mi en Passant gfrogt, ob i ehm saga könnt, wia mr zu de Berliner Philharmoniker kommt. No han i zu em gsait: „Do miassat se üba, üba, üba ...“

Musikanta send ganz bsondere Leit, weil se en andera Lebenswandel hend, wia de o'musikalische. Musikanta standat zom Beispiel om siebane auf, weil dr ALDI om achte zua macht. Die drei ärgeschte Feind von de Musikanta send nämlich: Frische Luft, Tageslicht on des Gebrüll von de Vögel.



Was muss en Musiker trenka, wenn'r 0,5 Promille han will?
Drei Dag lang nix.

Ondr de Musikanta en ra Bloskapell gib't's jo a Rangfolge der Virtuosität. Wenn oiner sei In-schdrument überhaupt net beherrscht, no gib't mr ehm zwoi Holzstöck en d' Hand ond sait ehm er sei dr Schlagzeuger. Wenn des au net klappt, no nemmt ma ehm oin weg ond sait, er sei jetzt Dirigent.

Dr Ondrschied zwischa ma Irrahaus ond ma Orcheschtr ischt, dass em Irrahaus wenigstchens dr Leiter normal isch.

Was isch dr Ondrschied zwischa ma Dirigenta on ma Kondom?
Do geit's koin: mit isch 's sicherer, aber ohne isch 's scheener.

Bis näggschd Woch'

Ihr
Wulf Wager

Unser Kolumnist moderiert am kommenden Samstag, 8. November um 19 Uhr in der Echterdinger Gemeindehalle die Vorstellung der neuen CD der Echterdinger Musikanten. Sie sind herzlich willkommen.